

永綏廳志

卷

二

水經圖

永綏廳志序

巍矣哉其爲永綏廳矣六里土民梗化歷代

國朝有天下七八十年尙未改流雍正八年

世宗憲皇帝詔湖廣總督湖南巡撫委署彝陵鎮總兵周一德辰永沅靖道兼副將王柔帶兵平六里而永順府古丈坪同知李垵與焉六里開闢設副將營吉多坪

賜名永綏協設六里同知一員以李垵任之治吉多坪未幾奉

旨改名永綏同知自是數十年無事民土向風乾隆六十年廳屬排打扣有癩苗之變嘉慶初戡定二年乃設總鎮於花園轄永綏協並置參將於保靖隸之

賜名曰綏靖鎮蓋協而廳而鎮皆

天賜嘉名此當爲海內各廳之所獨七年移廳治於花園移協於茶洞其水爲荊州九江西水之南源其山有臘耳苞茅老鳳猴子諸山緜亘六七百里之濶爲三苗氏唐虞來聚居之所處湖南極西之邊塞接壤四川之秀山縣貴州之松桃廳土風誠樸士女材健巍矣哉其爲永綏廳同知也所屬地方人民政事直隸行省監放鎮協軍餉管轄文武屯土員弁二百三十餘員名屯土戰守兵丁四五千名歲收屯田租籽二三萬石礮堡倉

厥百有餘座事權之宏當亦爲海內各廳之最蓋自天降生民則既莫不予以仁義禮智之性其大原所謂一陰一陽之謂道繼之者善也成之者性也仁者見之謂之仁知者見之謂之知仁之實義之實知之實禮之實不出於孝弟堯舜起諸侯庶人爲天子君天下開天明道至於今是昭惟孝弟而已矣不以益稷之所以治民治民賊其民者也不以臯夔之所以事堯事君不敬其君者也推孝弟而已矣道固如是耳治固如是耳豈有他歧我

朝

聖

聖相承謨烈顯赫爲四千年帝王重熙累洽未有之盛堯舜以來至我

朝治集大成百里之吏古之邦伯師長有格致誠正修身齊家之學而後可以言治不明斯道無以治民卽無以事

君永綏六里之民降衷有恒孝親敬長秉彝是則所以治之者舍道奚由前人之所以極力經營者兵防吏治食貨農桑二百年來何一非道之所維持鴻勳生性愚闇穆然思四千年之道流傳未墜際

累聖延休之盛世膺父母斯民之職守矢諸寤寐臨民蒞政不敢以權術以功利爲智善施於民惟道是歸宦湘十五年一任澧州州判未竟年無所表見光緒三十二年六月二十一日履古丈坪撫民同知署任宣統元年閏二月初三日得代將三年而未滿少有所作爲其於風俗人心亦無大效所以治民事

君者其於道固仍茫然惛然是月初六日遂接永綏直隸同知印務與李公珣之由古丈坪而永綏者遙遙相對將二百年矣蓋自光緒三十四年十月二十日奉檄量移至是四月十五日矣而後受事平時之耳聞而形諸想像者至是乃親見兵防學校屯田區畫之盛望洋而歎夢寐前列諸公才識之宏貽澤之遠

朝廷大臣謨謀之大寸土皆公里各設官鎮以營汎間以團防庠序鄉學之盛倉儲之廣此三代井田比閭之制而今東西洋所謂法治區也驅車十日徧歷所轄清訟三月頗察人情乃知鴻勳庸不勝任道所具存敬取舊志而讀之風雨鷄鳴耿耿如見昔之文武威風大臣循良賢長忠孝節義諸士女山川之清峻衣食養送之完備燦然咸在然其志曰乾隆戊午至同治戊辰百餘年間經五次修纂而後成書六卷近四五十年來世局日新言道日歧不可以不志在古丈坪廳曾爲作志無可因也故爲之創今永綏廳

志前諸君之以累世宿學修而輯之祇以續編較易倍蓰彼難而此易不可既任其難而諉其易不可以不志摺紳先生譽髦斯士見古丈坪廳志者或請爲永綏續之難其請不可以不志前之志古丈坪廳也不派費不設局不聘人以廉俸濟其紙筆飯食之用以淺學任其編纂撰述之勤永綏雖稍易籌欸於古然自官視之皆同也不敢厚古而薄永故仍不派費不設局不聘人以一身任其費任其勞永綏選舉附寄於永順府複選區下今年秀水金太守蓉鏡自靖州來守永順常以選舉事移牒往來問及論道之書若隱有以相啟故於此序及之至舊志之原本一字一行不敢易之其未詳者詳之應續者續之可參考以備一說者參考以備一說皆見於凡例之新增者夫道在中庸政惟其時學於古訓述而不作此著書之道蒞官臨民之道靖恭爾位以事堯事君之道子思之言曰夫婦之愚不肖可與知能鳶飛魚躍言其上下察道固無乎不在則永綏廳志以其爲言道之書固無不可雖然兵農學校昔人經營永綏廳者皆道之實而留貽孔長今鴻勳續修此志徒托空言其於道益遠也是則鴻勳之滋媿也前爲古丈坪廳志呈諸

學部批示以體例備而稍雜文詞詳而稍淺責之今永綏廳志體例惟依前人不致變

易已難望純而無雜文字則未矣況難採諸家以期言近而指遠毋淺之乎其爲言也則著書之道愈難矣所可諒者居官言職形方誦訓非以爲名山著作之業其於道也亦格物致知之一而已五月二十五日署永綏直隸廳同知直隸開州湘船董鴻勳甫起手修志而先爲序間以公務於二十六日早完稿

此序旣成稿僅修志一日因訟牘繁紛復患熱瘡仍停手直至八月十三日始復起手畧易數字而存之

重修永綏直隸廳志叙

古者列邦各有紀載成周命職方氏掌之方志之設實昉於此自嬴秦變封建爲郡縣今之府廳州縣卽古之侯伯子男也凡境內之星躔節朔土田民物制度典章例應備誌以供輶軒之採非特記封圻飾觀覽而遂已也永綏廳志肇於前廳壽春梁君璨成於漢陽段君汝霖梁志未見段志刊於乾隆十六年維時草昧初開百爲未舉以故志中如關隘水利義塚郵傳學校選舉政畧屯防人物藝文等類概從缺如就中如所已載城堡公署則中更遷徙兵制職官則遞有增加今昔旣有不同其餘各類亦多未備嘉慶二十二年丹徒袁君廷極因奉上游檄取重行修輯考文徵獻哀集成書尙未刊

行稿存廳署別無副本咸豐六年復爲蒲圻但君文恭遺失數卷現存者僅二卷所紀疆域山川水利津梁義塚公署戶口田賦學校祠廟凡十類仍多畧而不詳

玉衡奉檄

攝篆斯土索而觀之始知其故欲足成前業聞孝廉楊君聘侯夙有同心乃延司厥事楊君參考各史志以及前賢文集文武冊檔並諮訪故家遺老退弁殘兵廳中案牘或有散佚不全則郵書取諸附近廳縣旁搜遠紹壹志凝神歷一歲有五月之久始克成書

玉衡

時已改署永順楊君以是舉自我權輿寓書索叙竊維此書非楊君不能竟其

緒楊君非

玉衡

亦無以發其端也事有待其人而後行者其是類也夫爰次其顛末爲之

叙同治元年歲次壬戌暮春加知府銜前署永綏廳事蕭山周玉衡謹撰

鴻勳按序則周君修志時有段君汝霖志袁君廷極志二種以爲楊孝廉之藁本

廳志新叙

永綏苗地也亦邊疆也雍正九年始歸化當事者撫而輯之均其田土分六里爲上下十二里各置土弁以次相屬而約束之立營汎塘卡以嚴防範而間錯之又置屯貯穀設官長司征收出納焉患其不明義理也建書院外設義館四十九處科歲考及鄉試按名送費籌度精詳無不具備民苗雜處涵濡日久士變其習民安其業浸浸乎詩書

之氣漸盛士風丕變而所謂志者尙缺然昔雖奉檄修輯亦不過記其大凡畧而不詳
稿存廳署他無副本兵燹後又散失僅餘二卷更覺殘缺前署事周公玉衡欲足成前
業延孝廉楊君聘侯司其事參稽各史志博採旁搜分綱晰目至詳且悉規模甫竟周
適解職去楊亦相繼捐館舍然志已大備矣銜下車俗惇政簡公餘索志俱以經費不
敷尙未刊成相告且謂此志非周則莫覩其始非銜則莫成其功竊意郡邑有志猶國
之有史也凡政治得失風俗純漓或因時通變或隨事制宜徵文考獻官斯土者例應
備志以供輶軒之採非僅爲僻壤之記載此誠不可少而不可緩者也若未舉行銜猶
將率作興事況業有成書其可中止墮前人功乎夫莫爲之前雖美弗彰莫爲之後雖
盛弗傳諸君其踴躍鳩工鉅梓縱費有支絀一二銜卽捐廉歲事非敢謂周覩其始余
竟其緒冀垂休光昭後世也守土者固應奉行見

皇上文教誕敷無遠不屆雖邊疆苗地亦沐浴

聖化庶幾於文物之邦有足觀者焉豈得以邊荒而少之也哉

正三品廕生選授安徽婺源縣知縣改捐揀發湖南署華容縣知縣補授江華縣知縣
陞授永綏廳直隸同知王起銜撰并書

永綏廳舊志序

永綏地屬紅苗素號頑梗

聖世不忍棄之雍正九年

詔諭開闢遂納款輸誠收入版圖去其逸居無教之習卽乎詩書禮樂之隆苗民之懽欣愛戴得所歸也久矣獨是更化之始凡所爲建城郭以奠定之立官職以安輯之興學校以化導之創廨署設兵衛以捍禦之與夫設津梁以通往來置郵傳以達文告勸農桑以足衣食正風俗以厚人心者靡不上煩

睿慮之籌畫下勞循吏之措施幾經圖維調護而後蠻烟瘴雨之區得見此文物聲名之美也使非身處其地親歷其事者隨所見聞一一記載則不特山川勝蹟風土人情無由考據卽一時之規爲制度亦將歷久漸湮矣壽春梁君璨司牧其地籌度及之乃以其目之所覩者筆之於書彙而成編以備志乘其考訂確切詳畧適宜初無藉於踵事增華而自覺釐然畢具秩然有章一展卷而無不瞭如指掌余旣喜斯肇土興之實得賴以不泯而又以見

聖天子之宵旰勤勞凡窮荒僻壤盡在胞與之中雖詩書所稱無以加焉於是嘉其有關於

一統之宏圖非僅爲偏隅之記載也因綴數語以弁簡端乾隆戊午夏六月護湖南巡撫布政使綏德張璨序

鴻勳按張護院所序梁志亦甚可觀惜段志所採之條原文未及別白言之使梁志面目全失

梁志段志袁志以成周志周志所言舊志當以段袁二志爲據刊志又在王君起銜其參輯者何條惜皆無所考

重修永綏廳志序

永綏原六里地也開闢二十有二載矣前司馬梁君璨創爲廳志刻未及半卽去其職乾隆十二年汝霖蒞廳索志觀覽惟獲殘篇數十紙而已時卽有重修之意而薄書鞅掌奔走勞瘁未遑及也辛未奉撫軍檄令郡縣纂修志乘汝霖於公餘之暇勉強從事或採之史冊或訪之故老或參以己之見聞務期信而有徵夫永綏雖紅苗地自歸版圖以來

聖朝建官置吏教養生聚歷有年所其漸摩觀感不獨內地之遷斯土者遵道遵路卽蓬首跣足戴弩負戈之屬亦革面而革心矣汝霖嘗遍歷境內所過山川如高岩臘爾隆團

花園諸勝境奇峯聳翠蜿蜒蟠結既具雄偉之巨觀復饒清秀之逸致汝霖五載於斯未敢概視以苗疆也今之續志惟據其實而直書之不必踵事增華以圖美觀而斯地之勝愈樸而愈文彌淡而彌永矣爰就輿圖之廣狹道里之遠近官秩之尊卑戶口之多寡民苗之居址城垣之丈尺風俗之美惡物產之種類一一而詳記焉前志之所有者存之前志之所無者補之前志之所失者續之而永綏廳志於是規模粗定矣夫志所以鑑也彰往察來微顯幽闡考政治之得失觀人心之純澆因時而權其變通隨事而加以補救異日者開學校以儲人才陞田賦以納正供通商賈以利行旅廣土田以充邊餉日新月勝道一風同行見治化之臻於上理是所望於後之官斯土者

時乾隆十六年孟秋月同知漢陽段汝霖撰

鴻勳按段序甚清健所言似將梁志重修之梁志後本無單行本者然故周所未見

永綏廳志書跋

從來事莫難於創始功莫要於傳信因陋就簡固易遺譏而踵事增華亦妨失實況志之爲書所關尤鉅者哉我

朝幅員之廣過於前代卽湖湘邊徼向所不能綏柔者亦無不洗心革面永爲藩籬當事者奠麗陳教立法盡善歸化百餘年而文風之盛推永綏爲最此志所宜亟修也前署事周公謀其始聘侯孝廉董其事參考彙輯現任主公圖其成雖無藉於增華實洗從前草創之陋提綱標目井井有條他日者

國家有所修纂徵文考獻撫遺篇而採故實吾知其信而有徵者皆前之人創始之功之善也時戊辰孟夏下浣辛酉科選拔儘先教諭永綏廳順導醺湖麓爾氏潘邦燾題又按此則王君起衡亦曾有參考彙輯之事是此志一梁君璨二段君汝霖三袁君廷極四周君玉衡及楊孝廉五王君起衡蓋時閱二百年官經五七任而後成書秩然有序蓋方志之不易言也

周君玉衡下尙有耿君維中一任當亦與此志有關惜不見其文又梁君璨志未見而尙存其序袁君廷極志尙有兩卷何以不見其叙又觀周君玉衡叙文似段志雖

以百爲未備故不能如後志之盛而觀其言其書實未殘缺何以不言卷數皆屬難解

其書之未備故不能如後志之盛而觀其言其書實未殘缺何以不言卷數皆屬難解

永綏舊志跋

粵稽永綏一隅係古崇山衛地鎮溪所十里土民也前明設總戎駐劄衛城以鎮之後因水陸險阻艱於餉運撤去鎮守遂爲紅苗竊踞與內地間隔聲教不通日居月諸相習成風語言食味染於蠻俗等諸荒服然鼓舞作興自有轉樸還醕之漸竟以化外置之良可惜也雍正八年奉

旨開闢六里揆文奮武煥然一新以蠻烟瘴雨之鄉一旦遊於化日光天之下通魚鹽之貨亭樂利之庥以生以育沐浴薰陶有不革故鼎新者哉至於建立官吏修築城垣起造公廨設塘汛以及一切善後事宜已蒙各當事碩畫精詳無一不備世榮微員末秩僅效奔走時恐奉行不力以蹈隕越之愆惟有益竭駑駘勉供驅策耳今幸志書創始敬附芻言於末乾隆三年仲夏巡檢順天葉世榮跋

鴻勳按跋應列於卷後同治戊辰所刊乃列於卷首又叙跋相淆殊於體例不合勳不欲改易前志面目以從蓋闕之義仍其例惟併潘跋於張叙後以使叙跋無淆耳八月十三日復起手記

又按乾隆梁志既有序又有跋而周序乃謂未見實所未解袁志無序豈所餘非首

卷耶梁志序跋皆具載於段志耶則段既重修梁無單行本可見矣

重修永綏直隸廳志姓氏舊志原文

閱定

分巡辰永沅靖兵備道楊翰

主修

加同知府銜前署永綏直隸廳同知周玉衡

加同知府銜前署永綏直隸廳同知耿維中

永綏直隸廳同知王起銜

纂稿

舉人楊瑞珍

採訪

刑部員外郎前內閣中書張世準

直隸新河縣知縣石光榮

江西建昌縣知縣宋世煦

湖北東湖縣知縣石介